



Reina y Jump-up Escolar, otro demostracion di e energia di nos hubentud pa cu Carnaval



Definitivamente Hubentud a haci un cos den Carnaval 43. No ta promé biaha cu edicion di Carnaval di Bon Dia Aruba, esta **Alegría y Fantasía** a mencioná esaki, **Alegría y Fantasía** ta di opinion cu hubentud hopi biaha ta wordo subestimá tanto den nan comportacion como tambe den nan habilidad di organizá evento y actividadnan carnavalesco sin ningun tropiezo.

Eleccion di Reina Escolar tabata un éxito rotundo. Esaki no ta promé biaha cu e eleccion aki ta wordo organizá, pero sigur ta esun cu aña tras aña ta ganando mas popularidad no solamente entre hubentud, pero tambe adultonan cu ta aceptá cu esaki ta un actividad cu ta trece hubentud escolar huntu den un ambiente di Carnaval ameno y sano.

Apesar di tabatin menos candidata cu aña pasá y esaki debí na e corto tempo pa prepará y riba dje Januari tabata luna den cual mayoría di e scolnan tabatin C.P. week, e candidatanan di Juliana School, Maria College Mavo y Etao, Avond Mavo San Nicolas y Mon Plaisir College a presentá un tremendo show cada un original y trahá sin mucho gastonan entre e mesun estudiantenan.

Un parti especial di e eleccion cu ta yama hopi atencion ta e creacion di e disfraz cual tin como regla di ta creativo, no precisamente luhoso y trahá cu materialnan reciclabel, no caro y cu ta duna un mensahe na e comunidad, en especial e hubentud.

Despues di un anochi cu presentacion di diferente grupo di baile por supuesto hubenil y tambe e grupo hubenil di momento, esta B.M.W. e hurado di ocho miembro a keda cla cu e resultado cual ta e siguiente:

Mary Ellen Stoop di Juliana School como promé finalista di parti hubenil y Judella Vrolijk di Avond Mavo San Nicolas como Reina Hubenil Escolar. Zhulaida van der Biezen di Maria College Etao, promé finalista Reina Escolar y Jenneve Russell di Maria College Mavo a wordo coroná como Reina Escolar, titulo máximo di e anochi.

E otro evento grandi di hubentud durante temporada di Carnaval ta e jump-up Escolar, esaki a tuma lugar ayera Diabierna, parti mainta cu Maria College, Mon Plaisir y Colegio Arubano companá pa Quasi, EPB cu e banda EQO, Juliana School y La Salle cu T.I.G.O. y MTS y Paso Sigur cu Taxx pa Oranjestad na Playa tabatin Augustinus, Abraham de Veer, Martin Luther King y Filomena College cu O.R.E.O. y Climax pa San Nicolas.